



L'equipa victura cun ils gratulants da las instanzas politicas: Irene Schori, Franziska Kaufmann, Mario Cavigelli, cusseglier guvernativ, Adrian Steiger, president communal Flem, Hans Peter Michel, president dal cussegl grond, Binia Feltscher-Beeli e Christine Urech (da san.).



Gratulaziuns da Maria Cahenzli er per Gaudenz Beeli, il coach dal team da curling Flem.



Quai è la medaglia che las campiunnas da curling han gudagnà dasper il buccal.

FOTOS G. N. STGIER

«Quai è il pli bel regal per noss anniversari»

Flem: Festa per las campiunnas mundialas da curling

DA GION NUTEGN STGIER / ANR

■ Dapi intgins dis è Flem davairas il lieu svizzer da curling cun daventar las dunnas dal Club da curling Flem campiunnas mundialas. In success nunspitgà cunzunt er per tuts abitants e giasts dal lieu turistic sursilvan. Sonda è vegni fatg festa a Flem e quai sco. Ina rotscha indigens e giasts, uffants e seniors, tuts cun bandieras svizas èn sa reunids a partir da las 17.00 per lung da la via principala a Flem. Vegl e giuven, tuts èn vegnids per far onur a las campiunnas mundialas da curling e per assister a la festa organisada da la vischnanca da Flem e dal Club da curling Flem. En ina charrotscha han las campiunnas mundialas da curling lura giudi il viadi da triumf dal plaz da posta a Flem Casa d'Uaul fin tar la halla da festa. Per nus è quel viadi propi stà in mument fitg emozional, ha ditg Binia Feltscher-Beeli, il skip dal team. Quella equipa che ha procurà en Canada per ina bella surpraisa tar

il Campiunadi mundial da curling da las dunnas cun gudagnar la medaglia dad aur. Ina gratulaziun suenter l'otra han Binia Feltscher-Beeli, Irene Schori, Franziska Kaufmann e Christine Urech retschet cun plaschair.

«Flem betg mo in bun organisatur»

In dals numerus gratulants è er stà cusseglier guvernativ Mario Cavigelli. El ha ditg ch'il Club da curling Flem saja betg mo in bun organisatur per occurrenz da curling, mabain grazia a quella gronda victoria conferma il club er che a Flem vegnia giugà curling fitg professional. Il 1988 haja il club organisà cun success il Campiunadi da curling d'Europa ed avant 11 onns schizunt il Campiunadi mundial da curling. Mario Cavigelli è persvas ch'il titel da las campiunnas mundialas da curling vegnia ad avair in effect positiv per il lieu turistic. Ina mdeglia dad aur procura betg mo tar ils victurs ubain las victuras per grondas emozions, mabain er tar lur fans. Cun daventar cam-

piunnas mundialas da curling hajan las dunnas da Flem chaschunà emozions tar lur famiglias, tar blets indigens, tar ina rotscha Grischuns e schizunt per ina euforia en l'entira Svizra, ha ditg Hans Peter Michel, il president dal cussegl grond en ses pled da gratulaziun.

Darar ina uschè gronda preschientscha en la pressa

Losch da las campiunnas mundialas da curling è natiralmain er Adrian Steiger, il president da la vischnanca da Flem. Ses lieu haja darar gi in uschè gronda preschientscha en la pressa e quai en senn positiv, ha ditg il president communal da Flem. Losch da Binia Feltscher-Beeli è ses team è lura er Edi Crameri, il president dal Club da curling Flem. El è persvas che nagin club da curling sin l'entir mund haja fin uss retschet per ses anniversari da 65 onns in uschè bel regal sco quel da Flem, cun turnar l'equipa da dunnas a chasa da Canada cun la medaglia dad aur en la valischa.



Cun tensiun taidlan las campiunnas mundialas ed il president dal Club da culing Flem, Edi Crameri, ils plets da gratulaziun da cusseglier guvernativ Mario Cavigelli.



Da la regenza grischuna han las campiunnas mundialas da curling survegni cornas da capricorns e gi lur divertiment cun quellas.



La campiunnas mundiala da curling Binia Feltscher-Beeli cun ses um Reto e lur uffants Cla e Mea.



Binia Feltscher-Beeli cun in da ses fans giuven.